

**BOSNA I HERCEGOVINA**

*Konkurencijsko vijeće*



**БОСНА И ХЕРЦЕГОВИНА**

*Конкуренијски савјет*

**Z A K L J U Ć A K**

**o odbacivanju Prijave koncentracije privrednih subjekta Nestro Petrol a.d. Banja Luka,  
Bosna i Hercegovina i Rafinerija nafte a.d. Brod, Bosna i Hercegovina**

**Sarajevo  
mart 2011. godine**



**Broj: 01-26-1-02-5-II/11**  
**Sarajevo, 23.03.2011. godine**

Na osnovu člana 25. stav (1) tačka e), člana 42. stav (2), a u vezi sa čl. 12., 14. i 16. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po zajedničkoj Prijavi koncentracije privrednog subjekta Akcionarsko društvo za promet nafte, naftnih derivata i prirodnog gasa Nestro Petrol Banja Luka, Kralja Alfonsa XIII br. 9, Banja Luka, Bosna i Hercegovina i privrednog subjekta Akcionarsko društvo Rafinerija nafte Brod, Svetog Save bb, Brod, Bosna i Hercegovina, podnesenoj putem Diakonov Aleksandra, direktora privrednog subjekta Akcionarsko društvo za promet nafte, naftnih derivata i prirodnog gasa Nestro Petrol Banja Luka, zaprimljenoj dana 12.01.2011. godine pod brojem: 01-26-1-02-II/11, Konkurencijsko vijeće, na 11. (jedanaestoj) sjednici održanoj dana 23.03.2011. godine, je donijelo

### **Z A K L J U Č A K**

1. Odbacuje se zajednička Prijava koncentracije privrednog subjekta Akcionarsko društvo za promet nafte, naftnih derivata i prirodnog gasa Nestro Petrol Banja Luka, Kralja Alfonsa XIII br. 9, Banja Luka, Bosna i Hercegovina i privrednog subjekta Akcionarsko društvo Rafinerija nafte Brod, Svetog Save bb, Brod, Bosna i Hercegovina, radi nepostojanja koncentracije, u smislu člana 12. Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće zaprimilo je, dana 12.01.2011. godine pod brojem: 01-26-1-02-II/11, zajedničku Prijavu koncentracije (u daljem tekstu: Prijava) po kojoj privredni subjekt Akcionarsko društvo za promet nafte, naftnih derivata i prirodnog gasa Nestro Petrol Banja Luka, Kralja Alfonsa XIII br. 9, Banja Luka, Bosna i Hercegovina i privredni subjekt Akcionarsko društvo Rafinerija nafte Brod, Svetog Save bb, Brod, Bosna i Hercegovina (u daljem tekstu: Nestro Petrol a.d. Banja Luka i Rafinerija nafte a.d. Brod ili Podnosioci prijave) namjeravaju izvršiti zajedničko ulaganje na dugoročnoj osnovi kojim osnivaju u Republici Hrvatskoj privredni subjekt Nestro Sava d.o.o. trgovina naftom i naftnim derivatima, Gaženička bb, 23000 Zadar, Republika Hrvatska (u daljem tekstu: Nestro Sava d.o.o. Zadar).

Prijava je podnesena putem Diakonov Aleksandra, direktora privrednog subjekta Nestro Petrol a.d. Banja Luka, na osnovu punomoći broj: 300-8/11 izdate dana 10.01.2011. godine.

Konkurencijsko vijeće je uvidom u podnesenu Prijavu utvrdilo da ista nije bila potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterija za ocjenu koncentracija privrednih subjekta («Službeni glasnik BiH», broj 34/10), te je zatražilo dopunu iste aktom broj: 01-26-1-02-1-II/11 dana 18.01.2011. godine.

Podnosioci prijave su dostavili traženu dokumentaciju, podneskom broj: 01-26-1-02-2-II/11 dana 28.01.2011. godine.

Konkurencijsko vijeće je Podnosiocima prijave izdalo Potvrdu o prijemu uredne i kompletne Prijave, u smislu člana 30. stav (3) Zakona, dana 02.03.2011. godine broj: 01-26-1-02-3-II/11.

Podnosioci prijave su, u smislu člana 30. stav (2) Zakona, naveli da namjeravaju podnijeti zahtjev za ocjenu predmetne koncentracije Agenciji za zaštitu tržišnog natjecanja Republike Hrvatske.

Konkurencijsko vijeće je iz Prijave utvrdilo slijedeće činjenice:

## **1. Učesnici koncentracije**

Učesnici koncentracije su privredni subjekti Akcionarsko društvo za promet nafte, naftnih derivata i prirodnog gasa Nestro Petrol Banja Luka, Kralja Alfonsa XIII br. 9, Banja Luka, Bosna i Hercegovina i Akcionarsko društvo Rafinerija nafte Brod, Svetog Save bb, Brod, Bosna i Hercegovina.

### **1.1. Privredni subjekt Nestro Petrol a.d. Banja Luka**

Prema izvodu iz sudskog registra Okružnog privrednog suda u Banja Luci broj: 057-0-Reg-10-001273 od 21.09.2010. godine privredni subjekt Akcionarsko društvo za promet nafte, naftnih derivata i prirodnog gasa Nestro Petrol Banja Luka, Kralja Alfonsa XIII br. 9, Banja Luka, registrovan je u sudskom registru ovog suda pod brojem MBS: 1-10073-00.

Prema navedenom izvodu iz sudskog registra izvršen je upis promjene naziva na način da je raniji naziv društva Akcionarsko društvo za promet nafte, naftnih derivata i prirodnog gasa Petrol a.d. Banja Luka, zamijenjen nazivom Akcionarsko društvo za promet nafte, naftnih derivata i prirodnog gasa Nestro Petrol Banja Luka.

Osnovna registrovana djelatnost privrednog subjekta Nestro Petrol a.d. Banja Luka je trgovina na malo motornim gorivima i mazivima i distribucija i prodaja gasovitih goriva distributivnom mrežom.

Većinski vlasnik privrednog subjekta Nestro Petrol a.d. Banja Luka je privredni subjekt Otvoreno akcionarsko društvo NeftegazInKor, Kalanchovskasa 11, Build 2, Moskva, Ruska Federacija sa 80,000031% vlasničkog udjela.

Privredni subjekt Otvoreno akcionarsko društvo NeftegazInKor, pored privrednog subjekta Nestro Petrol a.d. Banja Luka, na tržištu Bosne i Hercegovine, 100,0% je vlasnik privrednog subjekta OPTIMA Grupa d.o.o. Banja Luka, a isto tako posjeduje i većinske udjele u privrednom subjektu Rafinerija ulja Modriča a.d. Modriča sa 75,651467% udjela i privrednom subjektu Rafinerija nafte a.d. Brod sa 79,998602% vlasničkog udjela.

Privredni subjekt Nestro Petrol a.d. Banja Luka pojedinačno ili zajedno nema više od 10,0% udjela u osnovnom kapitalu, odnosno 10,0% ili više prava glasa u nekom privrednom subjektu u Bosni i Hercegovini.

## **1.2. Privredni subjekt Rafinerija nafte a.d. Brod**

Prema izvodu iz sudskog registra Okružnog privrednog suda u Doboju broj: 60-0-Reg-10-000386 od 27.10.2010. godine privredni subjekt Akcionarsko društvo Rafinerija nafte Brod, Svetog Save bb, Brod, Bosna i Hercegovina, registrovan je u sudskom registru ovog suda pod brojem MBS: 85-02-0001-10.

Osnovna registrovana djelatnost privrednog subjekta Rafinerija nafte a.d. Brod je proizvodnja derivata nafte.

Većinski vlasnik privrednog subjekta Rafinerija nafte a.d. Brod je privredni subjekt Otvoreno akcionarsko društvo NeftegazInKor, Kalanchovskasa 11, Build 2, Moskva, Ruska Federacija sa 79,998602% vlasničkog udjela.

Privredni subjekt Rafinerija nafte a.d. Brod pojedinačno ili zajedno nema više od 10,0% udjela u osnovnom kapitalu, odnosno 10,0% ili više prava glasa u nekom privrednom subjektu u Bosni i Hercegovini.

## **2. Ocjena predmetne Prijave**

Dana 24.12.2010. godine u Slavonskom Brodu, Republika Hrvatska, zaključen je Društveni ugovor između privrednog subjekta Nestro Petrol a.d. Banja Luka, Bosna i Hercegovina, i privrednog subjekta Rafinerija nafte a.d. Brod, Bosna i Hercegovina, u cilju osnivanja privrednog subjekta Nestro Sava d.o.o. Zadar, Republika Hrvatska.

Privredni subjekt Nestro Sava d.o.o. Zadar se osniva radi obavljanja djelatnosti trgovine nafte i naftnih derivata, a osnivanjem istog doći će do širenja poslovanja privrednih subjekta Nestro Petrol a.d. Banja Luka i Rafinerija nafte a.d. Brod na tržište Republike Hrvatske.

Privredni subjekti Nestro Petrol a.d. Banja Luka i Rafinerija nafte a.d. Brod u većinskom su vlasništvu privrednog subjekta Otvoreno akcionarsko društvo NeftegazInKor, Ruska Federacija.

Prema članu 12. stav (1) tačka c) koncentracijom se, između ostalog, smatra zajedničko ulaganje na dugoročnoj osnovi, dva ili više nezavisnih privrednih subjekta, koji djeluju kao nezavisan privredni subjekt.

Obzirom da su privredni subjekti Nestro Petrol a.d. Banja Luka i Rafinerija nafte a.d. Brod u većinskom vlasništvu privrednog subjekta NeftegazInKor, Ruska Federacija, odnosno nisu nezavisni privredni subjekti, zajedničko ulaganje privrednih subjekta Nestro Petrol a.d. Banja Luka i Rafinerija nafte a.d. Brod ne predstavlja koncentraciju u smislu člana 12. Zakona.

Slijedom navedenog, Konkurencijsko vijeće je odlučilo kao u dispozitivu ovog Rješenja.

## **3. Administrativna taksa**

Podnosioci prijave na ovaj Zaključak, u skladu sa članom 2. tarifni broj 108. tačka d) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», br. 30/06 i 18/11) su dužni platiti administrativnu taksu u ukupnom iznosu od 1.000,00 KM, u korist Budžeta institucija Bosne i Hercegovine.

#### **4. Pouka o pravnom lijeku**

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Zaključka.

**Predsjednik**

**dr. Stjepo Pranjić**